

現代生活藝術系列

華嚴經疏論纂要

46

— 兜率宮中偈讚品

華藏淨宗學會印贈

大方廣佛華嚴經疏論纂要卷第四十六

五臺山清涼國師澄觀疏鈔

太原方山長者李通玄論

闕鼓山私淑比丘道霈纂要

兜率宮中偈讚品第二十四

○初來意

〔疏〕來意者。前明化主赴感。今明助化讚揚。及顯位體所依。故次來也。

○二釋名

〔疏〕釋名者。謂十方菩薩於此宮中讚佛實德。故受

斯名。通二種釋。如第三會

○三宗趣

〔疏〕宗趣者。集衆放光偈讚爲宗。爲說迴向爲趣。

〔論〕第一釋品名目者。明以金剛幢等十菩薩。各從異佛利來。處兜率天宮。至如來所。各化作妙寶師子之座已。各以十迴向法門。因果而偈讚之。故名偈讚品。異佛利者。從十行中來。入十迴向。第二釋品來意者。此品爲欲成十迴向中因果法門故。須此品來也。

○四釋文亦三初集衆。二放光。三偈讚。今初

爾時佛神力故

〔疏〕文二。先明集因。謂佛神力

十方各有一大菩薩。

〔疏〕二衆集。於中文二。先明此會。後如此世界下。結通。今初長分十段。一總舉上首

一一各與萬佛刹微塵數諸菩薩俱。

〔疏〕二眷屬數。

從萬佛刹微塵數國土外諸世界中來詣佛所

〔疏〕三來處遠近。位增數增。故各一萬

其名曰金剛幢菩薩。堅固幢菩薩。勇猛幢菩薩。光明

幢菩薩。智幢菩薩。寶幢菩薩。精進幢菩薩。離垢幢菩薩。星宿幢菩薩。法幢菩薩。

〔疏〕四王菩薩名。同名幢者。畧有五義。一高出義。表三賢位極故。二建立義。大悲攝生。智願攝善。歸向菩提。故三歸向義。謂大悲攝生。智願攝善。歸向菩提。及實際故。四摧殄義。如猛將幢。降伏一切諸魔軍。故五滅怖畏義。如帝釋幢。不怖惑業故。異名卽表十向行體。至偈當明。

所從來國。謂妙寶世界。妙樂世界。妙銀世界。妙金世界。妙摩尼世界。妙金剛世界。妙波頭摩世界。妙優鉢

羅世界。妙梅檀世界。妙香世界。

〔疏〕五所從來刹。皆稱妙者。迴向之力。微善彌於法界故。其別名。卽表十向所修法門。一救護衆生離衆生相。最可貴故。二得不壞信。常樂。因故。三等佛白淨故。四如金徧至諸色像故。五出用無盡。如摩尼故。六善根堅固。如金剛故。七隨順衆生。不染塵故。八眞如之因。如水生華。最爲勝故。九如白梅檀。能去熱惱之縛著故。十如彼香氣。能普周故。故下文慈氏座前燒一九香。彌滿法界。卽其事也。

前等者。卽六十七經。

鈔慈氏座

各於佛所淨修梵行。所謂無盡幢佛。風幢佛。解脫幢佛。威儀幢佛。明相幢佛。常幢佛。最勝幢佛。自在幢佛。梵幢佛。觀察幢佛。

〔疏〕六本所事佛同名幢義。不異菩薩。別名卽表修十向智。亦表當位之果。謂一救護之心不可盡故。成無盡佛。二如空中風。不住不壞故。三等佛解脫故。四威儀中無不至故。五明了功德相故。六常能隨順善根故。七隨順衆生善最勝故。八同於眞如。得自在故。九淨無垢染。不縛著故。十觀察卽是人法界故。

其諸菩薩。至佛所已。頂禮佛足。

〔疏〕七到已修敬。

以佛神力。卽化作妙寶藏師子之座。寶網彌覆周而徧滿。諸菩薩衆隨所來方。各於其上結加趺坐。

〔疏〕八善任威儀。座體云妙寶者。十任以慧光徧照。故以毘盧遮那藏爲體。十行以行淨離垢。故以蓮華藏爲體。今十向大悲。處於生處。普該萬法。不拘乎一。故座體直云妙寶。不限色類。以教行徧周。籠攝衆生。加以寶網。彌覆其上。

其身悉放百千億那由他阿僧祇清淨光明。此無量

光皆從菩薩清淨心寶離衆過惡大願所起。顯示一切諸佛自在清淨之法。以諸菩薩平等願力。能普救護一切衆生。一切世間之所樂見。見者不虛。悉得調伏。

疏九放光利物。此位多辨悲智救物。故復辨此於中初光體。次此無量下。辨光因卽圓淨迴向心。後顯示下。畧示光業。一智敬上業。二悲救下業。

其菩薩衆悉已成就無量功德。所謂徧遊一切諸佛國土無所障礙。見無依止清淨法身。以智慧身現無量身。徧徃十方承事諸佛。入於諸佛無量無邊不可

思議自在之法。住於無量一切智門。以智光明善了諸法。於諸法中得無所畏。隨所演說。窮未來際。辯才無盡。以大智慧開總持門。慧眼清淨。入深法界。智慧境界無有邊際。究竟清淨。猶若虛空。

疏十畧讚勝德。有十一句。初總餘別。別中十門。一神通門。二入證門。三以智下。依智修福。四入於下。上入果用。五住於下。住善決擇。六於諸下。四辨無盡。七智開總持。八慧眼見性。九智慧徧知。十究竟

離障

如此世界兜率天宮諸菩薩衆如是來集。十方一切

兜率天宮。悉有如是名號菩薩而來集會。所從來國。諸佛名號亦皆同等。無有差別。

〔疏〕結通可知

○第二放光

爾時世尊。從兩膝輪

〔疏〕文分四別。一放光處。言膝輪者。位漸高故。又表迴因向果等。有屈申進趣之相故。又悲智相導。屈申無住故。

放百千億那由他光明

〔疏〕二光數。

普照十方盡法界虛空界一切世界

〔疏〕三光照分齊。

彼諸菩薩皆見於此佛神變相。此諸菩薩亦見於彼一切如來神變之相。

〔疏〕四光所作業。謂令彼此互相見故。於中分二。初正明彼此相見。二如是下。釋見所由。三如是等下。結德所屬。

如是菩薩皆與毗盧遮那如來。於往昔時同種善根。修菩薩行。

〔疏〕二中。由二因故見。一宿因同行故。

論明諸菩薩從誰發心者。皆於自心無始分別無明。爲發心之始。達此無始無明。爲大圓鏡智故。卽與十方毘盧遮那如來同善根故。若離此智。無成佛期。無見佛日。是故經云。如是菩薩皆與毘盧遮那往昔同善根故。明達自無明。成大智體。諸佛共此智也。

悉已悟入諸佛自在甚深解脫。得無差別法界之身。入一切土而無所住。見無量佛悉往承事。於一念中周行法界自在無礙。心意清淨如無價寶。無量無數諸佛如來常加護念。共與其力。到於究竟第一彼岸。

恒以淨念住無上覺。念念恒入一切智處。以小入大。以大人小。皆得自在通達無礙。已得佛身與佛同住。獲一切智。從一切智而生其身。一切如來所行之處。悉能隨入。開闡無量智慧法門。到金剛幢大智彼岸。獲金剛定。斷諸疑惑。已得諸佛自在神通。普於一切十方國土。教化調伏百千萬億無數衆生。於一切數雖無所著。善能修學成就究竟方便安立一切諸法。

疏二悉已下。現德圓滿故。文有二十句。束爲十對。

一離障成身對。二入刹近佛對。三用速心淨對。四外護內證對。五能覺所覺對。謂一切智處是所覺。

故六用廣證深對。身卽智身。同住法界及大悲故。
七得智生身對。身卽應身。八行深解廣對。九智極
定深對。此位中顯名金剛幢對金剛定。卽菩提智。
十得通立法對。由得通故。調化無數。由離數故。而
能安立數有二種。一數量數。二色心有爲。皆名爲
數。今文具二。謂由不著一多。能立一切故。不著於
有。能安立故。卽真俗鎔融。謂世俗幻有之相。相本
自空。勝義真空之理。理常自有。有是空。有非常有。
斯有未曾不空。空是有空。非斷空。此空何嘗不有。
有空。空有體一名殊。名殊故。真俗互乖。迢然不雜。

體一故。空有相順。冥然不二。一與不一。不即不離。

鎔融無礙。菩薩智契其源。所以雖迥絕無寄。而善

修安立。鈔一離障成身對者。以文易故。疏不指經。今當指之二入一切土下。入利對三於一

念中下是四無量無數下是五恒以淨念下是六以小人下是七獲一切智下是八一切如來下

是九到金剛。幢下是十已得諸佛自在下是由離數下。釋立法。謂世俗下。別是眞俗鎔融之相。相從

緣生。舉體即空。理非斷滅。故常自有。然有三意。此上第一當體以明。二有是空有下。明二諦交徹成

一。即有是空。即空是有。二有空空有。結成鎔融。即仁王云。於諦常自二於解常自一。通達此無二眞

入第一義也。從菩薩智契下。結成能立。

如是等百千億那由他不可說無盡清淨三世一切無量功德藏。諸菩薩衆皆來集會。在於佛所。因光所

見一切佛所。悉亦如是。

〔疏〕三結德所屬。謂無盡德。屬於此會菩薩。及光中所見也。

〔論〕如來放光處所表法者。十信足下輪中放光。以信爲初。十住足指端。明入聖位之初。十行足跌。明依聖性法身起行。十迴向膝上放光。以膝者。人之坐起迴旋卷舒自在之所由也。明此迴向位法門。是迴真處俗解脫無染之大智。以悲願利生。處生處而恒涅槃。涅槃與生處無礙自在。以放光處表之。十地眉間放光者。表中道果光也。

○第三偈讚十菩薩卽爲十段。亦十方如次皆先標說人。及說儀式。今初東方金剛幢菩薩。

爾時金剛幢菩薩承佛神力。普觀十方而說頌言。

〔疏〕金剛幢菩薩者。此是會主名。含總別總顯迴向。不出悲智。金剛者。堅利也。卽悲之智。二乘實際不能壞。堅也。斷難斷。惑利也。故云智慧到彼岸。卽智之悲。愛見不能動。堅也。無所不救。利也。故文中徧利利生。七十八云。譬如金剛。唯從金剛處及金處生。非餘寶處生。菩提心金剛亦復如是。唯從大悲救護衆生。金剛處。一切智智殊勝境界。金處而生。

非餘衆生善根處生。故知金剛不獨喻智。攻般若者。不得此意。但以標名。獨將金剛喻於般若。不觀文中。悲濟九類。而無所度。悲智相導。方爲真實。不共般若。智者應知。別名卽是救護衆生。悲也。離衆生相。智也。義不殊總。說頌儀式。頗見上文。鈔故知金剛下。

四結彈。以今古諸師。皆唯般若。若喻金剛。故不觀文中。下。成上失意。以金剛經具悲智爲金剛。故彼經云。佛告須菩提。諸菩薩摩訶薩。應如是降伏其心。所有一切衆生之類。若卵生。若胎生。若濕生。若化生。若有色。若無色。若有想。若無想。若非有想。若無想。我皆令入無餘涅槃。而滅度之。悲濟九類。如是滅度無量無數無邊衆生。實無衆生得滅度者。等。大智而無所度也。故疏結云。悲智雙運。

論從爾時佛神力故已下。至而說頌言。五十二行

經明金剛幢等十菩薩衆。十方來集。彰因示果。不
二分。餘如文具明。

如來不出世。亦無有涅槃。以本大願力。

示現自在法。是法難思議。非心所行處。

智慧到彼岸。乃見諸佛境。

〔疏〕正顯頌文十頌。歎佛寂用無礙德。大分爲二。初
八讚佛勝德。後二結勸修行。今初分三。初五偈寂
而常用。次一偈用而常寂。後二無礙自在。今初分
三。初二偈無生滅而示生滅。於中前偈就法正顯。
後偈寄對顯深。以依體起用。體用無礙。故難思議。

又心有心想動不能行。故難思議。智無智相。名到彼岸。方見佛境。

色身非是佛 音聲亦復然 亦不離色聲

見佛神通力 少智不能知 諸佛實境界

久修清淨業 於此乃能了

疏次二偈。非色聲而現色聲。亦前偈就法正顯。後偈寄對顯深。少智謂權小。久修謂圓機。素習見聞。故能了實。

正覺無來處 去亦無所從 清淨妙色身

神力故顯現

〔疏〕後一頌明無來去而示來去。覺處卽現。不從方來。迷處自無不從此去。以神力故。示有來去。然從神力中來。卽無來矣。

無量世界中 示現如來身 廣說微妙法
其心無所著

〔疏〕二用常寂中。三句用。末句寂

智慧無邊際 了達一切法 普入於法界

示現自在力 衆生及諸法 了達皆無礙

普現衆色像 徧於一切刹

〔疏〕三無礙自在中。初偈了事理無礙。起用自在。後

偈了生法無礙。起用自在。可知

欲求一切智 速成無上覺 應以淨妙心

修習菩提行 若有見如來 如是威神力

當於最勝尊 供養勿生疑

〔疏〕後二偈結勸中。初偈勸修智進行。後偈勸修福

斷疑

○第二南方堅固菩薩

爾時堅固幢菩薩。承佛神力。普觀十方而說頌言

〔疏〕堅固者。表不壞迴向故。菩提心堅故。觀佛無厭

故

如來勝無比 甚深不可說 出過言語道
清淨如虛空 汝觀人師子 自在神通力
已離於分別 而令分別見 導師爲開演
甚深微妙法 以是因緣故 現此無比身

〔疏〕十頌多明如來爲物所依德。於中分二。初三讚佛勝德。後七勸修辨益。前中初頌明佛體離言。次偈無相現相。後偈現相所因。

此是大智慧 諸佛所行處 若欲了知者
常應親近佛

〔疏〕後七中。舉修有益。卽顯佛德深玄。文中分三。初

得指德勸依。卽結前生後

意業常清淨

供養諸如來

終無疲厭心

能入於佛道

具無盡功德

堅住菩提心

以是疑網除

觀佛無厭足

通達一切法

是乃真佛子

此人能了知

諸佛自在力

〔疏〕次三示能入者。令物思齊。各先舉行。後彰行益。

廣大智所說

欲爲諸法本

應起勝希望

志求無上覺

若有尊敬佛

念報於佛恩

彼人終不離

一切諸佛住

何有智慧人

於佛得見聞

不修清淨願

履佛所行道

〔疏〕後三正勸進修。然夫進修畧有五法。謂欲、精進、念、巧慧、一心。初偈明欲。次偈辨念。後偈巧慧。前二正明。後一反顯。一心精進。攝在志求之中。〔鈔〕然夫者。釋此三偈。自有二重。一約五法。即智論文天台取之。為二十五方便。此第五。五止觀。具云。謂前二十法。雖備。若無樂欲。怖慕。一也。身心苦策。二也。念想。三也。方便。四也。一心決志者。五也。止觀無由現前。釋曰。上即反釋。下順釋云。若能欣集無厭。一也。曉夜匪懈。二也。念念相續。三也。善得其意。四也。一心無異。五也。此人能進前路。一心喻船。施巧慧如點頭。三種如篙。櫓。若少一事。則不安穩。無此五法。事禪尚難。何況理定。二約九因。釋具如疏鈔。

○第三西方勇猛菩薩

爾時勇猛幢菩薩。承佛神力。普觀十方而說頌言

〔疏〕淨心智力。見佛盡源。等一切佛。故名勇猛。

譬如明淨眼。因日觀衆色。淨心亦復然。

佛力見如來。如以精進力。能盡海源底。

智力亦如是。得見無量佛。

〔疏〕十頌分二。前六明感應道交。見佛聞法。後四令捨僞求真。拂見聞相。故此一段。總顯如來見聞弘益之德。前中前五。各上半喻。下半合。通分爲二。初二見佛。後四聞法。前中初偈。雙明感應。淨心如淨眼。爲見之因。佛力如日。爲見之緣。如來如色。爲見之境。如人入暗則無所見。斯則獨因不見也。如明

淨日。瞽者莫見。獨緣不見也。此辨因緣和合方能見也。鈔此辨因緣者。正同金剛經云。如人有目。日光明照。見種種色。但彼以般若為日。法中明心不任法。則內心自有。後偈偏舉於感。以因奪緣。因緣不同佛力為日也。如出現品云。此非如來威神之力等。如出現品者。謂佛光救地獄衆生生天。便即念言。此是如來威神之力。佛便報言。此非如來威神之力。若一衆生於如來所不種善根。能得如來少分智慧。無有是處是也。

譬如良沃田 所種必滋長 如是淨心地

出生諸佛法 如人獲寶藏 永離貧窮苦

菩薩得佛法 離垢心清淨 譬如伽陀藥

能消一切毒 佛法亦如是 滅諸煩惱患

真實善知識 如來所稱讚 以彼威神故
得聞諸佛法

〔疏〕後聞法中。四偈分三。初偈顯因能生法。次二顯
得法之益。前偈得權智。能離所知心垢。後偈有根
本智。能除煩惱之患。三一偈顯緣。今聞法故。上文
云。佛法無人說。雖慧莫能了。

設於無數劫	財寶施於佛	不知佛實相
此亦不名施	無量衆色相	莊嚴於佛身
非於色相中	而能見於佛	如來等正覺
寂然恒不動	而能普現身	徧滿十方界

譬如虛空界 不生亦不滅 諸佛法如是
畢竟無生滅

〔疏〕後四令捨偽求真中二。前一示偽令捨。任相施
故。以色相見佛。行邪道故。後三顯真令求。初二偈
顯真佛。前偈卽相非相。故非色能見。後偈卽寂而
應。故不可以寂取。末偈顯真法。真法無生滅故。

○第四北方光明幢菩薩

爾時光明幢菩薩承佛神力。普觀十方而說頌言

〔疏〕以大悲力。運智慧光。朗彼重昏。無所不至。名光
明幢。又以智慧。令諸善根無所不至。故

人間及天上 一切諸世界 普見於如來
清淨妙色身

〔疏〕此頌中。多顯如來卽體化用周普之德。十頌分
三。初一化用廣。亦明化處。次七化用深。亦明化依。
後二雙結釋化。

譬如一心力	能生種種心	如是一佛身
普現一切佛	菩提無二法	亦復無諸相
而於二法中	現相莊嚴身	了法性空寂
如幻而生起	所行無有盡	導師如是現
三世一切佛	法身悉清淨	隨其所應化

普現妙色身

疏。化依中分四。初四雙明能所依。次一拂其能化心。次一拂其所依體。後一雙融自在。今初。初偈總明一多無礙。依一總心。變多王所。於一實佛。應化多端。故無礙也。次一相二無礙。無相現相。無二現二。體絕能所。故云無二。相依身有。是卽二也。然相二相對。應成四句。畧舉其一。無二現二。卽於一現多。乃至百千。亦名二故。次偈顯依性起。起不異性。故如幻無盡。後偈從法身流。舉三世佛。以顯道同如來不念言。我作如是身。自然而示現。

未嘗起分別

〔疏〕二佛能化心中。謂如摩尼珠。無私成事故。

法界無差別 亦無所依止 而於世間中

示現無量身

〔疏〕三一偈佛所依。謂上無二無相。法性法身。卽是法界。法界本自無差。亦無定有。爲化依止。由無依無別。故爲依爲別。故下文云。虛空雖無所依。能令三千世界而得安住。如空無色。而能顯現一切諸色。

佛身非變化 亦復非非化 於無化法中

示有變化形

疏四一偈。雙融自在。言非非化者。此有二義。一假

非化以遺化。非謂是非化。則上半約體絕待。下半

依體起用。二不礙化故。然真化無二。融為一身。不

壞體用。名依真起。依真起者。則報亦依真。非謂三

身。獨一是化。鈔非謂是非化者。此一向是遮。即拂

言非是有。非謂是非。非有人。但非其心中計人。愚人聞之。

便謂此机。是於非人。非人即鬼。故人執雖無鬼。執

却起。故為惑耳。故下釋云。上半絕待。則化與非化。

兩亡。二不礙化。故者。即重釋亦復非非化。此即以

化遺於非化。則上句非變化者。即是真身故。亦復

非非化者。有化用故。前釋上半是體。下半是用。今

此上半自具體用。依於後義。廣釋經文。於中三先

總明。然約正身。自有多義。一法報合爲真身。應化
合爲化身。二法身爲真身。報應皆爲化身。今依此
義。故云非謂三身。獨一是化。且依真起化。畧有二門。一開義二
融合。初中真應各有二義。真中一不變義。謂雖化
而常湛然。初句顯之。二隨緣義。謂不守自性。無不
現故。故云亦復非非化。一約化中。一無體卽空義。
謂攬緣無性。故云於無化法中。二從緣幻有義。故
云示有變化形。二融合中。亦二義。一真化別合。二
真化融通。初中。由真中隨緣卽不變故。是故亦真
亦非真。非真非不真。名真法身。化中。體空卽幻有
故。是故亦化亦非化。非化非不化。名爲佛化身。二

融通者。謂由真不變。顯化體空。此真不無化。不有以爲法身。而不無化用。以有化中空義故。又由真隨緣。顯化幻有。此是化不無真。不有以爲化身。而不無真理。以有真中隨緣義故。又由隨緣幻有。不異不變體空故。是故現化紛然。未嘗不寂。真性湛然。未曾不化。真化鎔融。爲一無礙清淨法界。宜審思之。

正覺不可量

法界虛空等

深廣無涯底

言語道悉絕

如來善通達

一切處行道

法界衆國土

所徃皆無礙

〔疏〕第三二偈。雙結釋中。前偈結歸於體。謂智冥真境等法界故。深無底。等虛空故。廣無涯。皆絕言道。爲不可量。後偈舉因釋成。所以法界無礙者。智行徧故。

○第五東北方智幢菩薩

爾時智幢菩薩。承佛神力。普觀十方。而說頌言。

〔疏〕於佛寂用之境。決斷無礙故。又智導萬行。出生無盡。故名智幢。

若人能信受 一切智無礙
修習菩提行 其心不可量

〔疏〕頌中多歎如來應現出生無盡無礙之德。十頌分二。初一標章勸信。信有修行之益。

一切國土中 普現無量身 而身不在處

亦不住於法

〔疏〕後九所信勝德。於中分二。初一總餘八別。總中上半用而無盡。下半寂而無住。不著應處。不住法體。卽本末雙寂也。通爲寂用無礙。

一一諸如來 神力示現身 不可思議劫

筭數莫能盡 三世諸衆生 悉可知其數

如來所示現 其數不可得

〔疏〕別中二。初二明無盡。一一衆生前。能現無盡身。故衆生可知。佛不可數。

或時示一二。乃至無量身。普現十方刹

其實無二種。譬如淨滿月。普現一切水

影像雖無量。本月未曾二。如是無礙智

成就等正覺。普現一切刹。佛體亦無二

非一亦非二。亦復非無量。隨其所應化

示現無量身

〔疏〕後六明無礙。於中三。初四一異無礙。亦是本未無礙。一法。二喻。三合。四釋。

佛身非過去 亦復非未來 念現出生

成道及涅槃

〔疏〕次一偈。延促無礙。

如幻所作色 無生亦無起 佛身亦如是

示現無有生

〔疏〕後一偈。性相無礙。

○第六東南方寶幢菩薩

爾時寶幢菩薩。承佛神力。普觀十方而說頌言。

〔疏〕以圓淨智。照平等理。不礙應現。隨順一切。如摩

尼寶。故名寶幢。

佛身無有量 能示有量身 隨其所應觀

導師如是現 佛身無處所 充滿一切處

如空無邊際 如是難思議

〔疏〕頌中多顯平等超世之德。十頌分二。前五總顯

難思。後五迥超時數。前中初二正明。前一超量現

量。後一超處徧處。故出現品云。譬如虛空徧至一

切色。非色處等。如是難思。雙結上二。

非心所行處 心不於中起 諸佛境界中

畢竟無生滅 如翳眼所覩 非內亦非外

世間見諸佛 應知亦如是 饒益衆生故

如來出世間 衆生見有出 而實無與世

〔疏〕後三展轉釋成。初云。何以難思。若身若處。非生滅心行之境故。何以非心境。佛自不起心故。何以不起。體無生滅故。若爾。何以現見。次偈釋云。病眼所覩。取色分濟。勿謂爲實。次疑云。若爾。豈無如來出現世耶。次偈釋云。自機見耳。上三句以應就感。衆生謂出。末句旣因物感。出卽非出。名實不出。故諸法無行經云。如來不出世。亦不度衆生。衆生強分別。作佛度衆生。旣無有出。安有沒耶。上三亦初一超心行。次一超內外。後一超出沒。

不可以國土 晝夜而見佛 歲月一刹那
當知悉如是

〔疏〕後五偈。迴超時數而現時數。於中初一偈。結前標後。國土結前處故。

衆生如是說	某日佛成道	如來得菩提
實不繫於日	如來離分別	非世超諸數
三世諸導師	出現皆如是	譬如淨日輪
不與昏夜合	而說某日夜	諸佛法如是
三世一切劫	不與如來合	而說三世佛
導師法如是		

疏後四別顯超時。初偈立宗。上半牒妄情。下半正立。菩提是有法。定不繫時。是宗法。次偈立三因。一智無分別故。二三世不遷故。三體非有爲之數故。次偈舉同喻。謂日體常明故。不合昏夜。後偈合結。上半合。下半結。合中語倒。若順應云。一切諸如來。不與三世合。又若以超時現時爲宗者。則上宗中。四句皆宗。應云。菩提是有法。定不繫日。隨機說日。是宗法。因云。體非三世等。不礙三世等故。同喻云。如日輪。不合昏夜。以山映故。說有日夜。合云。佛無三世。以不應見機之所映故。而說三世。是則上三

句皆合。下一句結

○第七西南方精進幢菩薩

爾時精進幢菩薩。承佛神力。普觀十方而說頌言。

〔疏〕勤觀如來。真應皆同。故能平等隨順一切衆生。
名精進幢

一切諸導師 身同義亦然 普於十方刹

隨應種種現

〔疏〕十頌顯此同義。文分爲二。初一總標。餘九別釋。
前中上半正標。下半畧顯同相。言身同者。三身十
身。皆悉同故。義亦然者。此含多意。一且約三身體。

依。聚。義。無。不。同。故。所。覺。能。覺。覺。他。同。故。又。義。名。所
 以。所。以。得。名。佛。者。正。覺。真。智。力。無。畏。等。無。不。具。故。
 得。名。為。佛。佛。佛。皆。然。故。義。同。也。又。應。用。利。樂。無。不
 同。故。故。攝。論。第。十。二。云。諸。佛。法。身。應。知。恒。時。能。作。五
 業。等。二。十。一。種。功。德。之。中。名。為。逮。得。一。切。佛。平。等
 性。所。依。意。樂。作。業。無。差。別。故。（鈔義亦然者下。出三
 意。一。釋。三。身。及。與。佛
義。體。即。法。身。依。是。報。身。聚。是。化。身。所。覺。下。所。覺。自
 法。身。能。覺。是。報。身。覺。他。化。身。又。義。名。所。以。者。明。成
 佛。所。以。即。具。眾。德。故。問。明。云。十。方。諸。如。來。同。共。一
 法。身。一。心。一。智。慧。力。無。畏。亦。然。諸。佛。法。身。者。即。應
 化。法。身。言。五。業。者。攝。論。云。第。一。救。濟。有。情。災。橫。為
 業。於。暫。時。見。便。能。救。濟。盲。聾。狂。等。諸。災。橫。故。二。救
 濟。惡。趣。為。業。拔。諸。有。情。出。不。善。處。置。善。處。故。三。救
 濟。非。方。便。為。業。令。諸。外。道。捨。非。方。便。求。解。脫。行。置

於如來聖教中故。四救濟薩遮耶見爲業。授之能
超三界道。五救濟諸乘爲業。拯拔欲趣餘乘諸菩
薩及不定性諸聲聞等。安置善處。令修大乘行故。
於此五業。應知諸佛業用平等。若梁攝論當第十
五二十一。指上品所依智等。二約十身釋義
事。佛佛平等。無性亦明。是利他德。二約十身釋義
同者。皆通三世間。彼此互望。無差別故。種種利樂
。居然是同。此有三因。一。行海齊滿。二。大願齊具。三
。同一法性故。非唯相似。亦一卽一切。互相融故。餘
。如問明品說。下半同相。畧舉應用同。以應卽真故。
。非應之外。別明法身是同。然普有二義。一。約諸佛。
。謂無有佛不徧十方故。二。約一佛。謂無一方而不
。現故。

汝觀牟尼尊 所作甚奇特 充滿於法界
一切悉無餘 佛身不在內 亦復不在外
神力故顯現 導師法如是 隨諸衆生類
先世所集業 如是種種身 示現各不同
諸佛身如是 無量不可數 唯除大覺尊
無有能思議

〔疏〕後九別釋中分二。先四頌正釋。後五頌轉釋。前中初偈。釋前偈於十方。無餘二義。一無處不徧故。二一切皆佛身故。諸佛本師。一頌影畧。次偈釋前現義。謂有感方現。故云非內。神力能現。故云非外。

次偈釋前隨應種種義。一隨物類。則十法界等。萬類殊應。二於一類中。隨其先業。各見不同。如金色塗灰等。後偈釋前身同之義。結成難思。佛身皆同。無數量故。唯除大覺者。佛佛同證故。

如以我難思 心業莫能取 佛難思亦爾

非心業所現 如刹不可思 而見淨莊嚴

佛難思亦爾 妙相無不現 譬如一切法

衆緣故生起 見佛亦復然 必假衆善業

譬如隨意珠 能滿衆生心 諸佛法如是

悉滿一切願 無量國土中 導師興於世

隨其願力故 普應於十方

〔疏〕後五轉釋中。從後向前。釋上四偈。前四兼喻。後一唯法。於中初二釋第四無能思義。一以我爲喻。謂如妄計之我。本無所有。故不可思。此以妄計情有理無非聖智境。以況法身理有情無非下位測。後偈以利爲喻。喻雖絕相難思而不礙相。次一偈釋第三隨業異現。所以要隨業者。同一切法。必假緣故。此以總喻別。次一謁釋第二非內外義。如珠現物。雖非內外能滿物心。後偈釋充滿法界義。所以能滿者。本願普周故。

○第八西北方離垢幢菩薩

爾時離垢幢菩薩承佛神力普觀十方而說頌言

〔疏〕真如體淨能成白法復淨世間故名離垢。鈔真如體

淨第八迴向中義復淨世間即今偈意

如來大智光 普淨諸世間 世間既淨已

開示諸佛法 設有入欲見 衆生數等佛

靡不應其心 而實無來處

〔疏〕十頌多歎如來淨德前六淨他後四自淨前中

前二總明後四別釋今初前偈智淨妄惑既寂真智不無開示無我知見性相故名爲法後偈身淨

謂佛應顯真。

鈔妄惑既寂等者。揀異斷空。開示已下。卽法華開示悟入意也。

以佛爲境界

專念而不息

此人得見佛

其數與心等

成就白淨法

具足諸功德

彼於一切智

專念心不捨

導師爲衆生

如應演說法

隨於可化處

普現最勝身

佛身及世間

一切皆無我

悟此成正覺

復爲衆生說

〔疏〕後別釋中。前一釋第二偈。後二釋初偈。前中初

偈正明。欲見諸佛。應專佛境。隨念隨現。故名心等。

又了心境。卽佛真性。迷則不知。念則便現。次偈轉

釋專念之義。無漏具德。故能專念。隨念隨現者。此有二意。一隨念多。少佛亦等之。如稱一口。有一化佛等。二隨念淺深。佛應稱之。見有優劣。又了心境下。約觀心釋。即心即佛。後二中。前偈釋普淨世間。說法現身而之義耳。能淨故。後偈釋開示佛法。示其所悟。二無我故。

一切人師子 無量自在力 示現念等身

其身各不同 世間如是身 諸佛身亦然

了知其自性 是則說名佛 如來普知見

明了一切法 佛法及菩提 二俱不可得

導師無來去 亦復無所住 遠離諸顛倒

是名等正覺

〔疏〕後四自淨中。初一已淨差別之用。後三內淨三德。一見性成佛。自開法身。稱性現應。次偈無得成佛。自開般若。佛法所覺。菩提能覺。必能所相因。故俱叵得。無所得者。則得菩提。後偈離妄成佛。自開解脫。不動無住故。妄倒斯寂。名真解脫。

○第九下方星宿幢菩薩

爾時星宿幢菩薩。承佛神力。普觀十方而說頌言。

〔疏〕解佛徧應法界之身。而不離法性。若彼星宿。然羅空。不可縛著。故以爲名。

如來無所住 普住一切刹 一切土皆往

一切處咸見 佛隨衆生心 普現一切身

成道轉法輪 及以般涅槃 諸佛不思議

誰能思議佛 誰能見正覺 誰能現最勝

〔疏〕十頌顯佛此德。分爲三別。初三總顯卽體之應。

次六別釋體應自在。後一拂去自在之迹。前中初

偈約處顯身之徧。謂法性身。則無所任。約自受用

則無所不住。名爲普任。約他受用及變化身。有感

則往。故云一切土皆往。若約十身。無處非佛。故云

一切處咸見。鈔謂法性身者。此初一偈。上三句約

四身說徧。第四句約十身說徧。此十身正說衆生國土等十身故。則有虛空處。卽虛空身。有國土處。卽國土身等。故無非佛身矣。次

偈約機顯身之多。故云一切。及八相事。皆由物感。後偈結歎難思。初句總標。下三句顯相。二句約感不能思。思惟約心。見通心眼。下句約應難思。云誰能現。

一切法皆如 諸佛境亦然 乃至無一法
如中有生滅 衆生妄分別 是佛是世界
了達法性者 無佛無世界 如來普現前
令衆生信喜 佛體不可得 彼亦無所見

〔疏〕次六別釋中。初三順釋。後三反釋。今初。初偈釋前誰能現義。謂現卽同如。無生滅故。次偈釋前誰

能思義。謂起心而思。是妄分別。有依有正。法性之中。能所斯寂。後偈釋前。誰能見義。謂能應隨緣。體本自無。能感之機。竟何所見。

若能於世間 遠離一切著 無礙心歡喜

於法得開悟 神力之所現 卽此說名佛

三世一切時 求悉無所有 若能如是知

心意及諸法 一切悉知見 疾得成如來

〔疏〕後三反釋中。謂由無思見等。方能思等。則反顯前有思見等。不了佛境。於中初偈無思思。要無著無礙故。次偈無現現。神力之現。體卽虛故。後偈明

無見見。躡前無所有。爲見前稱實之見。非唯見佛。亦得疾成。

言語中顯示 一切佛自在 正覺超語言
假以語言說

〔疏〕三一偈佛自在之迹者。上明自在。尙假言詮。正覺超言。故佛言迹。超言亦假。應忘契之。

○第十上方法幢菩薩

爾時法幢菩薩。承佛神力。普觀十方而說頌言。

〔疏〕知真實之法。普入法界。則所修行。皆無分量。故名法幢。知法名佛。故先讚見佛之益。

寧可恒具受 一切世間苦 終不遠如來
不覩自在力

〔疏〕十願雙顯佛法難聞。於中分二。前四讚佛。勸人
聞見。後六讚法。勸物聞求。前中初一。正令甘苦近
佛

若有諸衆生 未發菩提心 一得聞佛名
決定成菩提 若有智慧人 一念發道心
必成無上尊 慎莫生疑惑 如來自在力
無量劫難遇 若生一念信 速證無上道

〔疏〕後三釋其所以。畧舉二事。初偈聞名益。次偈發

心益。後偈。生信益。既受苦得明成。斯勝益。受樂不
觀。不免長淪。故應甘苦而近佛也。

設於念念中

供養無量佛

未知真實法

不名爲供養

若聞如是法

諸佛從此生

雖經無量苦

不捨菩提行

一聞大智慧

諸佛所入法

普於法界中

成三世導師

雖盡未來際

徧遊諸佛刹

不求此妙法

終不成菩提

衆生無始來

生死久流轉

不了真實法

諸佛故興世

諸法不可壞

亦無能壞者

自在大光明

普示於世間

疏後六中。已遇良醫。復須法藥。於中初二。由聞實法。能成行法。前反後順。次二。由聞理智。成於果法。前順後反。後二。以感應釋成。前偈佛興。由生迷實。後偈說法。示於真實。不動真際。建立諸法。則性不可壞。不壞假名。而說實相。則相不可壞。斯則天魔外道等。皆法印。故無能壞。餘如十藏品。上十菩薩之偈。應以六相圓融。鈔上十菩薩下。總結言六相者。一總顯佛德。二別則十德。三同則同明佛德。四異則十德互望。五成則共成佛德。六壞則各任自性。所以偈後無結通者。為顯法界兜率讚德異故。猶彼處處文殊。偈偈各別。顯佛德無盡故。

論已上各說一法。其成十迴向心。或但說有衆生著有。或但說無衆生著無。如經星宿幢菩薩頌云。衆生妄分別。是佛是世界。了達法性者。無佛無世界。法幢菩薩頌云。寧可恒具受。一切世間苦。終不遠如來不觀自在力。此二頌皆相成就有無。恐墮邊見。餘例知。如觀十方。何意爲觀衆意之同別。亦觀十方世界諸佛。法同不二。

兜率天宮偈讚品竟

大方廣佛華嚴經疏論纂要卷第四十六

壽寧三峯寺比丘等擬同徒正愷刻
華嚴經兜率宮中偈讚品疏論纂要第
四十六卷伏願泛般若船入華藏海供
養諸佛於刹刹塵塵廣度含生於在在
處處仰報四恩普資三有
康熙二十二年九月 日華藏室謹題